

Kerweredd 2012

	
Verfasst von Nino Piazza	Vorgetragen von Tobias Wohlfart

Sou jetzt sog isch „Herzlich willkumme“ ehr liewe Leit,
zur Kerwe in Hoamboach, meer sinn bereit.

Ich grieiß alle Hoambecher unn roigeritschde,
unn will dodruff aach nett verzischde,
zu grieiße Hepprum, Bensem unn Kerschhause,
Wald-Erleboach unn Mittershause,
unn ich waas aach gonz gewiss,
dass Besuch aus em Elsaß bei uns iss!

Will aach donke, sou kimmt meers in de Sinn;
bei alle - die beim Umzug mitgelaafe unn mitgefahn sinn:

Die letschd Zeit sinn jo veel Bolitiker zurickgetraede;
Vor allem de Wulff usern Oldbundespraesident;
Weil der wie meer en kennt; Urlaubsreise hott bekumme gepend:

Deshalb wors desjohr in Hoamboch schwierig gewese;
Ich soag es eich gonz unbelese;
Die rischdische Kerweborsch zu finne;
Die uffrischdisch unn guter Dinge;
Niemols in ehre Laewe; des sinn koa Bosse
Fun de Birgit in de Rous zum Gloas Woi sich oilode gehabt haewwe katte losse:
Die, die heit dostäi, des iss foi,
sinn uffrischdisch unn schuldefrei... noja!

Sou stell ich eich moi Monnschaft vor;
Unser diesjaehrishi Rousekoenigin; mit Applaus waerd nett gespart;
Unser liewie Sina Flath!
Begleitet wärd se, des iss foi unn prima,
vun de Olivia Schubel unn de Fischers`Marina.

Aus de Versenkung erwacht unn old gedient,
stät do als Kerweborsch, de Schusters Kevin!
Unn endlich iss ach der jetzt drann,
soin Nomensvetter der Schuster – Julian!

Kerwekönigin:
Unn in die Presch gesprunge, der iss immer parat,
hält die Kerweredd unser Tobias Wohlfahrt!
Drumm fong endlich ou, ich konns nett mäi erwarte,
unn gäbt meer en Woi, for moin Hals, denn zarde!

Zum Wohl!

Musik

Eh Auto iss wischdisch bei uns im Ort,
denn sunscht kimmte aus dem Doal nett fort,
heit häwwe die Autos, ich konns nett vergesse,
sou allerhoand Technik unn veel Raffinesse!
Sou hot die Hoamels Inge, als Fraa fun Welt,
ehemols Baustoff unn Oel, ein jeder kennt,
sich eh nei Auto glei mol bestellt, unn fährt die Kischd, seid gonz ohr,
mindeschdens schun mäi als e Johr!
Doch letschd häb ich gedenkt, mit nem Wink,
fährt see des Doal nuff unn es blinkt.
Die Warnblinkleucht, ja, die wor ou,
ach Gott, hoffentlich iss nix om Auto drou.
Doch wie ich se gefrogt häb „Iss wos bassiert“
Sägste zu meer unscheniert:
„Nix iss bassiert, ich wor blouß benumme,
unn bin aus Versäje on en komische Schalter gekumme,
unn ruck-zuck, wos leit meer drou,
wor die Warnblinkoulach ou.
Unn ich Nuss häb donn nett mäi gewisst,
wu des Warnblinklicht auszuschalte ist!
Liewie Hoamels-Inge, ich soags voll Verheißung,
bevor du fährt, gugg in die Gebrauchsanweisung!

Musik

Muss i denn zum Städele hinaus

Des Thema „Auto“ iss noch nett rum,
schau ich mich bluß mol in de Wäschinggass um!
Denn die Fraa Leis wor gonz verbittert,
ach wos hott die Fraa gezittert,
Dere heed mer, in dere Nacht,
eventuell Klebstoff ins Auto-Schloss noigemacht!
Unn ehr Leit, dess iss koan Bluff,
sie bekeem des Auto nett mäi uff!
Die Meons Martina, die Tilgers Steffi und de Wolfahrts-Tobi worn in Vedacht.
Weil meer in dere heilischi Nacht,

for die Gesundheit en Gewinn,
dorch die Wärschingasse getschogingt sinn.
Meer sinn donn ons Auto, unn häwwe gemerkt,
ach Gott der Schlissel is jo gonz verkehrt!
Denn der Schlissel , wu die Fraa Leis hott katte,
wor gar nett for dere ehrn eigene Wache,
sondern funn de Parrsekretärin Ballweg-Schramm ,
die einen Volvo fahren kann!
Unn die Fraa Leis, dess iss doch schee,
fährt seit jeher en VW!
Die Frau Leis hott aus Versäije, des sinn koa Bosse,
de Schlissel fun de Frau Ballweg mitgäi losse.
So klärte sich in de Noacht noch, dess iss koan Bluff,
des Missgesachick donn endlich uff!

Uff alle Autoschlissel en herzliches Proschd,

unn säh immer zu, dass du doin eigne oistecke hoscht!

Zum Wohl!

Musik

Wonn meer als Renter wie meer weiß,
veel zeit hot, gäit meer in de Seniorenkreis.
Do sinn die Hoambecher olde noch gonz fit,
unn mache jede Fahrt aach mit.
Sou wor dessmol im Ougebot,
meer hot sou alles ausgelot,
meer hot sich donn nett long besunne,
unn iss uff die Weltstadt Berlin gekumme.
Es machte de Senioren jo gar koan Schoade,
der Michael Meister, MdB hott oigelode!
Bundestoag unn Konzerlomt,
worn gonz schick unn intressont,
sou ginge donn, meer dreht sich rum,
die paar Doag gonz schnell aach rum!

Die Rickfahrt wor gonz ougenehm
In Sachse wors jo aach noch scheen,
doch korz vor Hoamboch, wor schun Schluß,

gestreikt hot donn de grouße Bus!
Eh Rittle wor pletzlich und ach e Schlottern,
der Modor, der fing ou zu stottern,
hott noch zwa mol gezuckt, des wor nett schäi,
genau om Gähstich ging nix mäs!
Der Fahrer, ja do wär isch meschugge,
hott vergesse uff die Tonkuhr zu gugge!
Ja, die Berlinfahrt die wor schäi,
doch der Bus der blieb donn leider om Gaestich stäi!

Fahrt ehr mit em Kraftfahrzeug,
donn guggt bitte liebe Leit,
das ganz sicher unn gewiss,
noch ebbes Sprit im Tonk drin iss!
In moim Gloas haeb ich noch Sprit,
drum houch des Gloas unn trinkt all mit:
Prost

Musik

Wie faschd jeder waas, unn des seit Jahren,
dutt des Kerwekomitte in allen zwei Jahren,
oamol rischdisch ins Ausland fahren!
Vorsjohr wor Bomberg des Reiseziel:
Die Meons Martina als Fraa fun welt,
hott extra zum friehstick die Weck beim Stolli bestellt:
Doch beim Friesticksplatz bei Babehause wor aus de Traum,

die Weck hott se vergesse, die worn dehoam noch im Kofferraum:

Sou blieb ehr letztlich nix erspart,

die neie worn donn aus dem Supermarkt:

Erschd owends noch de Rickfahrt bei de Birgit in de Rous,

wurd se die old Weck unn ehrn Riwwelkuche lous.

Liewie Martina, gugg beim negschde mol,

unn vergewisser dich,

ob noch ebbes bei deer im Kofferraum drin iss.

Unn du bei de Fahrt unn beim Friehtick vermeide,

dass die Fahrgaescht nett sou en grouse Hunger erleide.

Prost

Musik

Dass die Hoambecher tierlieb sind,

des waas aach in Hepprum unn Bensem jedes Kind!

Vun Katze, Hunde, Hoase kennt ich berichte,

doch dodruff will ich heit jo gonz verzichte.

Sou redd ich heit lieber herzlich unn frei,

vun Hoambecher Wildsauzichtere!

Dess iss bassiert, ich soags gonz nett,

beim Staffas-Karl in der Wasserschepp.

Der iss im Februar, monn ou mon,

funn sechs Frischling Vadder worrn.

Die Wildsaumouk sou gonz versaut,

hott sich im Karl soim Gaade des Neschd gebaut,

mit Brennessel, Grous unn wos sou dezugeheert,

hott die Sau gonz unbeschwert,
ehr Junge dort griecht, des wor e Ding,
gefraacht häwwe sich do de Ute ehr Zwilling.
Der Karl hot gedenkt, ach dess is doch foi,
ich stecke die all in moi Hoasekäschde noi,
do waad ich donn nur noch e paar Woche,
donn gibt's Spanferkel mit wenisch Knoche!
Doch die old Sau hot gedenkt sou groadewohl,
liewer Karl du konnscht mich mol!
Denn noch zwaa Doag, die Zeit wor knapp,
iss die Mouk mit ehre Frischling ab!
Liewer Karl, sou wärd des nix,
kaaf der doin Willsaubrode in de Bix!

Zum Wildsaubroode, des iss doch foi,
schmeckt doch immer en guude Woi!

Prost

Musik

Wonn Hoambecher junge Doame moahne,
sie messte mol naus in die Welt,
donns stäin se paarat un sinn bereit,
denn bis noch Besem iss nett sou weit!
Sou häwwe unsere ehemalische Kerwekönischinne,
ich kann mich on die Noame gut entsinne,
die Tilschers Theres, die Werners Carina,

unn aach noch die Anna Staffa,
sinn, demit se gut parke kenne gonz foi,
mim Auto in Bensem ins Parkhaus noi!
Ausgerechnet ins Parkhaus, die Mädchen vum Lond,
die Oitrittstechnik, die häwwe se gekannt.
Doch wie se mim Schopping ferdisch worn sinn,
ja ehr Leit des wor eh Ding,
stäins se, ja des wor faschd en Spagat,
vor dem Parkschoiautomat,
unn häwwe brav unn unbefliesse,
des Parkgeld schee dort oigeschmisse,
doch häwwe se, des iss neet gelooche,
den Parkschoi zum Austritt nett raus gezoche!
Donn sinn se zum Ausgang gefahn, des iss doch klaa,
unn on den Schronk koan Parkschoi wor da!
Unn hinne drou des wor en Graus,
wohlte noch zwonzisch onnern Autos naus!
Der Kerl im Kasseheisel hot geholfe,
ich soag dezu nixmäi,
sunnscht deede die Doame dort heit noch stäi!

Vielleicht wor zumindeshd, des wär doch foi,
im Kofferraum en gute Woi,
donn wär bei all der Waaderei im Auto hocke,
die Kehl nett trocke!

Prost

Musik

Mühlen und Handwerk, wos worn des Zeite,
hier im Ort, meer wollte es zeige,
demit des nett, des wär doch schoad,
vergesse gäit in unserm Ort!
Ich donk eich all, ehr liewe Leit,
dass ehr sou long gestanne seid,
und eich häbt gonz unbeschwert,
die Kerweredd heit ougeheert!
Ich hoff, es hott eich Spass gemacht,
und ehr häbt e bissel gelacht!
Zum Glick iss jetzt noch nett zu spät,
es longt noch for äh Stoußgebeet:

Singend:

Liewe Parrer Röhr, bitte für uns:
loss die Kerwe gut rumgäi,
donn wärd die im nexschd Johr genausou schäi,
bitt for uns, dass meer häwe Kraft,
genung trinke zu kenne fum Rebensaft!
Schenk uns nochst aach süsse Träume,
unn los uns hier jo nix versäume!
Sunnst wär ich später iwwerzwersch,
schließlich worn meer heit moijend in Kärch!
Prost

„Wem ist die Kerwe“